

Pekebun kecil RISDA, Felcra dapat 'durian runtuh'

Dividen RM189.08 juta

Oleh MAISARAH SHEIKH RAHIM
maisarah.rahim@mediamulia.com.my

PUTRAJAYA: Perdana Menteri mengumumkan pembayaran dividen berjumlah RM189.08 juta kepada pekebun kecil Pihak Berkuasa Kemajuan Pekebun Kecil Perusahaan Getah (RISDA) dan peserta Lembaga Penyatuan dan Pemulihan Tanah Persekutuan (Felcra).

Tan Sri Muhyiddin Yassin berkata, kerajaan melalui Kementerian Pembangunan Luar Bandar bersetuju menyelaraskan pengagihan dividen tersebut sebagai usaha membantu pekebun kecil di bawah kedua-dua agensi itu.

Katanya, seramai 16,080 pekebun kecil RISDA yang mengusahakan tanaman getah dan sawit di bawah Rancangan Tanam Baru Berkelompok (RTBB) dan 15,165 pekebun kecil Tanam Semula Komersil (TSK) bakal menikmati

dividen tahun 2020 dengan jumlah RM82.03 juta melibatkan keluasan 39,430 hektar.

"RISDA turut mengagihkan keuntungan zakat korporat kepada lebih 4,000 asnaf pekebun kecil dan institusi agama terpilih dengan nilai zakat RM2.48 juta.

"Sebanyak 58,826 peserta Felcra Berhad akan menerima agihan akhir lebihan keuntungan tahun 2020 sejumlah RM107.053 juta secara berperingkat, bermula hari ini," katanya berucap dalam majlis Penyampaian Dividen RISDA dan Felcra tahun 2021 di Kuala Lumpur, semalam.

Muhyiddin berkata, agihan akhir lebihan keuntungan Felcra 2020 itu hasil keuntungan bersih 890 projek ladang peserta Felcra.

Katanya, bayaran agihan itu melengkapkan amalan pembayaran keuntungan tahunan tiga kali setahun iaitu pada bulan

Ogos, Disember dan April setelah akaun projek siap ditutup.

"Agihan keuntungan itu adalah hasil keuntungan bersih 890 projek ladang-ladang milik peserta yang dimajukan oleh Felcra.

"Bakinya 327 projek adalah projek yang belum berhasil dan dalam fasa tanaman semula," katanya.

Beliau berkata, kerajaan sekali lagi menyediakan Bantuan Musim Tengkujuh (BMT 2021) kepada 232, 319 pekebun kecil melibatkan RM69.9 juta membatik pembayaran RM600 seorang pada kadar RM300 untuk Disember ini dan Januari depan.

Katanya, dalam membantu pekebun kecil meningkatkan pendapatan menerusi penanaman getah, kerajaan memperluas skop Bantuan Tanam Semula Getah dan pekebun boleh membuat permohonan untuk tanah kosong.